

# REGLUR

## um atkvæðagreiðslu um hvort kvótakerfi í mjólkurframleiðslu skuli afnumið frá og með 1. janúar 2021

### I. Kaffli

#### 1. gr.

##### *Gildissvið*

Reglur þessar gilda um atkvæðagreiðslu í umsjón Bændasamtaka Íslands (hér eftir BÍ) skv. gr. 14.3 í samningi um starfsskilyrði í nautgriparékt, dags. 19. febrúar 2016. Þar segir að BÍ skuli láta fara fram atkvæðagreiðslu meðal mjólkurframleiðenda um hvort kvótakerfi í mjólkurframleiðslu skuli afnumið frá og með 1. janúar 2021.

### II. Kaffli

#### Form og framkvæmd atkvæðagreiðslu

#### 2. gr.

##### *Form atkvæðagreiðslu*

Atkvæðagreiðslan skal fara fram rafrænt.

Kjörstjórn hverju sinni er heimilt að fela þriðja aðila að annast tæknilega hlið kosninganna. Þess skal gætt að ákvæði þessara reglna séu virt og að ekki sé hægt að rekja greidd atkvæði til tiltekins kjósanda.

#### 3. gr.

##### *Skipan kjörstjórnar, kærur o.fl.*

Stjórn BÍ hefur skipað þriggja manna kjörstjórn vegna atkvæðagreiðslu skv. 1. gr. og skal einn þeirra skipaður formaður.

Kjörstjórn ber ábyrgð á undirbúningi og framkvæmd atkvæðagreiðslu skv. reglum þessum.

Allar kærur vegna undirbúnings og framkvæmdar skal kjörstjórn úrskurða um jafnskjótt og þær koma fram. Kærufrestur er til loka kjörfundar og skal meðferð kærumála lokið áður en úrslit eru tilkynnt.

Kjörstjórn skal sjá til þess að öll kjörgögn séu fyrir hendi þegar atkvæðagreiðsla á að hefjast.

#### 4. gr.

##### *Auglýsing atkvæðagreiðslu og birting niðurstöðu*

Kjörstjórn skal auglýsa atkvæðagreiðsluna með auglýsingu í Bændablaðinu og á heimasíðu BÍ.

Kjörstjórn skal í auglýsingunni tilgreina að kosningin sé rafræn og hve lengi hún stendur.

Kjörstjórn tilkynnir stjórn BÍ um niðurstöðu atkvæðagreiðslunnar þegar hún liggur fyrir.

5. gr.

#### *Um kjörseðla*

Stjórn BÍ ákveður hverjir valmöguleikar á kjörseðli skulu vera. Þess skal gætt að kjörseðill sé stuttur og skýrt orðaður þannig að engum dyljist til hvers tekin er afstaða. Gefinn skal möguleiki á að taka ekki afstöðu en jafnframt upplýst að slík atkvæði teljist með greiddum atkvæðum.

6. gr.

#### *Rafræn atkvæðagreiðsla*

Atkvæðagreiðslan skal standa yfir í a.m.k. 7 heila sólarhringa. Upphaf atkvæðagreiðslunnar skal auglýst með a.m.k. 5 sólarhringa fyrirvara.

Rafræn atkvæðagreiðsla skal framkvæmd þannig:

#### **a) Kjörskrá**

1. Kjörstjórn útbýr kjörskrá.
2. Kjörstjórn sendir þjónustufyrirtæki (hér eftir „þjónustufyrirtækið“) sem annast vistun kosningar kjörskrána í excel-skrá eða á öðru því formi sem nauðsynlegt er þar sem fram koma a.m.k. kennitölur kjósenda.
3. Þjónustufyrirtækið útbýr aðgang fyrir hvern kjósanda og vistar með öruggum hætti.
4. Kjörskrá ásamt lykilorðum skal einungis vistuð hjá þjónustufyrirtækinu þar sem hún er varin fyrir aðgangi annarra en þeirra sem setja upp aðgang fyrir kjósendur á vefnum.
5. Kjósendur skulu auðkenna sig með rafrænum skilríkjum eða Íslykli.

#### **b) Kjörgögn**

6. Kjörstjórn samþykkir kynningarefni og útbýr önnur kjörgögn sem kynnt verða kjósendum.

#### **c) Vefaðgangur**

7. Kjörstjórn sendir þjónustufyrirtækinu upplýsingar um uppsetningu, kynningu og/eða spurningu/spurningar á „kjörseðli“ og valkosti fyrir rafræna kosningu.
8. Þjónustufyrirtækið útbýr vefaðgang. Enginn hefur aðgang að upplýsingum um efni kjörskrár nema þeir starfsmenn þjónustufyrirtækisins sem vinna við uppsetninguna og tæknilega útfærslu kosninganna.
9. Þess skal gætt að ekki fleiri en tveir starfsmenn þjónustufyrirtækisins hafi slíkan aðgang og skal aðgengi takmarkað með lykilorðum. Þá skulu viðkomandi starfsmenn bundnir trúnaði um þær upplýsingar sem þeir kunna að hafa aðgang að eða komast yfir í tengslum við atkvæðagreiðsluna.
10. Tryggja verður að ekki sé hægt að rekja greidd atkvæði til tiltekinna kjósenda, þ.e. skilja ber að notandanafn og greitt atkvæði þannig að ekki sé hægt að rekja þessar upplýsingar saman.

11. Rafræn atkvæði skulu ekki sett í sameiginlegt safn til talningar fyrr en kosningu og afgreiðslu kjörskrárkæra er lokið.

12. Kjörstjórn tekur við kærnum inn á kjörskrá og úrskurðar þær. Ef aðili er úrskurðaður inn á kjörskrá, setur þjónustufyrirtækið viðkomandi inn á kjörskrá og gerir þær ráðstafanir sem nauðsynlegar eru til þess að hann geti kosið.

13. Þegar atkvæðagreiðslu er lokið skal þjónustufyrirtækið loka fyrir möguleika á kosningu.

14. Þjónustufyrirtækið veitir formanni kjörstjórnar eða umboðsmanni hans aðgang að niðurstöðum kosninganna í gegnum stjórnborð heimasíðu félagsins þegar kosningu er lokið eða kemur niðurstöðu til þeirra með öðrum hætti.

15. Gögnum vegna kosningar skal eytt þegar sex mánuðir hafa liðið frá lokum atkvæðagreiðslu.

16. Tryggt skal að á vefsíðu BÍ verði hægt að finna leiðbeiningar um framkvæmd atkvæðagreiðslunnar og kynningarefni.

### **7. gr.**

#### *Hverjir hafa atkvæðisrétt*

Allir skráðir innleggjendur mjólkur skv. upplýsingum frá félögum í Samtökum afurðastöðva í mjólkuriðnaði þann 1. janúar 2019 njóta atkvæðisréttar. Bæði lögaðilar og einstaklingar hafa atkvæðisrétt. Hver innleggjandi hefur eitt atkvæði.

### **8. gr.**

#### *Kjörskrá, aðgangur og kærur*

Kjörstjórn skal sjá um, að kjörskrá sé tilbúin þegar atkvæðagreiðsla er auglýst.

Opnað skal fyrir rafrænan aðgang að kjörskrá þar sem kjósendur geta kannað hvort þeir séu á kjörskrá sjö sólarhringum áður en atkvæðagreiðsla hefst. Kjörskrá skal lokað tveimur sólarhringum áður en kosning hefst.

### **9. gr.**

#### *Lausn ágreiningsmála*

Rísi ágreiningur um ákvæða þessara reglna úrskurðar kjörstjórn um ágreininginn.

Þannig samþykkt í stjórn Bændasamtaka Íslands.